

OKRUŽNOM SUDU U DOBOJU

Na osnovu člana 43. stav 2 tačka z. i člana 241. stav 1 Zakona o krivičnom postupku Republike Srpske, podižem

O P T U Ž N I C U

PROTIV:

Ključević Mire, rođen 1957. godine u Bosanskom Brodu,

ŠTO JE:

Kršeci pravila međunarodnog prava, sadržana u odredbi člana 3. stav 1 tačka a. i c. IV Ženevske konvencije o zaštiti građanskih lica za vrijeme rata od 12. avgusta 1949. godine i odredbi člana 13. stav 2 u vezi sa članom 4. stav 1 i 2 tačka a. i e. Dopunskog protokola uz Ženevske konvencije od 12. avgusta 1949. godine o zaštiti žrtava nemeđunarodnih oružanih sukoba od 08. juna 1977. godine (Protokol II), za vrijeme oružanog sukoba u Bosni i Hercegovini između organizovanih oružanih snaga Vojske Republike Srpske, s jedne strane, i Armije Bosne i Hercegovine i Hrvatskog vijeća odbrane, s druge strane, na području opštine Bosanski Brod (sada Brod), kao pripadnik HVO-a, tokom mjeseca maja 1992. godine, nanosio povrede tjelesnog integriteta i primjenjivao mjere zastrašivanja, prema civilima koji nisu pripadali ni jednoj vojnoj formaciji, niti su učestvovali u oružanim operacijama, na način da je:

1. tačno neutvrđenog dana tokom mjeseca maja 1992. godine, u prostorijama Kriznog štaba u naselju Tulek, opština Bosanski Brod (sada Brod) primjenjivao mjere zastrašivanja, prema oštećenom D.B., na način da je naredio oštećenom da skine svu odjeću sa sebe i da sjedne na stolicu za sto, što je oštećeni i učinio, a osumnjičeni je sjeo preko puta njega, i tada rekao oštećenom da njegov brat D.N. puca sa krova kuće i da u dvorištu kuće ima ukopan višecjevni bacač, pa kada je oštećeni odgovorio da to nije tačno, osumnjičeni mu je rekao da ako ne puca brat onda puca on, pa kada je oštećeni navedeno negirao, osumnjičeni je tražio od pripadnika HVO-a B.A. nož koji mu je i dao nož na sklapanje sa oštricom dužine oko 20 cm, da bi tada osumnjičeni uzeo nož i rekao oštećenom „priznaj ili ću ti odsjeći nogu“, pa kako oštećeni D.B. nije priznao, osumnjičeni mu je rekao da će ga odvesti u Radnički dom u Slavonski Brod i da će ga tamo objesiti za noge i pustiti kerove da ga rastrgaju,
2. 17. maja 1992. godine u prostorijama Kriznog štaba u naselju Tulek, opština Brod (sada Brod), gdje je bilo prisutno više pripadnika HVO-a, nanosio povrede tjelesnog integriteta i primjenjivao mjere zastrašivanja, prema oštećenom D.N., na način da je tražio od oštećenog D.N. da prizna gdje su mu braća, pa kada je oštećeni odgovorio da ne zna, rekao mu je da su svi oni utekli u četnike i sad pucaju na njega, nakon toga mu naredio da

stavi glavu na sto, što je oštećeni i učinio, ponovo tražeći da oštećeni prizna gdje mu se nalazi brat D.P. i rođak Č.S., pa kada je oštećeni odgovorio da ne zna, zajedno sa drugim pripadnicima HVO-a oštećenom zadavao udarce šakama i nogama po cijelom tijelu, ali najviše u predjelu glave i bubrega, da bi nakon toga tražio od pripadnika HVO-a, J.I. nož da zakolje oštećenog, pa kada mu je J.I. dao nož Ključević je rekao „tup je za njega ovaj nož, daj oštiri da četniku izvadim čašicu sa lijevog koljena“, nakon čega oštećenom rasjekao pantalone na lijevom koljenu, a zatim mu nožem napravio ranu na lijevom koljenu iz koje je počela da teče krv, prijeteći da će mu izvaditi čašicu,

3. tačno neutvrđenog dana tokom mjeseca maja 1992. godine u prostorijama Kriznog štaba u naselju Tulek, opština Bosanski Brod (sada Brod), gdje je doveden oštećeni D.N. i gdje se u tom trenutku nalazilo više pripadnika HVO-a, primjenjivao mjere zastrašivanja, prema oštećenom D.N., na način da je osumnjičeni rekao pripadniku HVO-a, L.P. „idi kući i donesi ekser 12-ku i čekić, da vidim koliki četnik ima mali mozak“, da bi nakon toga zajedno sa drugim pripadnikom HVO-a, J.I., oštećenog D.N. postavio uza zid, nakon čega mu je J.I. naslonio pištolj na glavu, govoreći mu da nema njemu smrti bez drvenog malja, sad ćeš priznati sve, dovešću ti brata D.B. pa ću te pred njim ubiti, bolje da priznaš gdje su ti braća Srbi, nakon čega su u prostoriju doveli brata oštećenog, D.B. kome su rekli „pogledaj brata posljednji put ode on rijekom Savom u banju kod Miloševića“, na šta je D.B. odgovorio da odmah ubiju i njega, a potom su oštećenog D.B. odveli u podrumske prostorije, a njemu sajlom vezali ruke na leđa i ubacili ga u auto i odvezli u staru zgradu Stanice javne bezbjednosti Brod, gdje su ga predali pripadnicima Zbora narodne garde iz Požege, govoreći mu da će tu morati sve priznati,
4. tačno neutvrđenog dana tokom mjeseca maja 1992. godine u podrumu Vatrogasnog doma u Bosanskom Brodu (sada Brod), gdje se u tom trenutku oštećeni D.N. nalazio skriven, primjenjivao mjere zastrašivanja, na način da je došao zajedno sa drugim pripadnicima HVO-a, tražeći od oštećenog D.N. ključeve od skladišta na željezničkoj stanici gdje je oštećeni radio, nakon čega su ga odveli kući da uzme ključeve, pa kada su došli u skladište, tukli su ga rukama i nogama po tijelu, štambiljem i slikom na kojoj se nalazio lik „Tita“, nakon čega su ga oblijepili trakom za lijepljenje kutija oko stabla lipe, a potom ga podigli na visinu od oko 40 cm od zemlje i ruke mu svezali za granu lipe, nakon čega su pucali preko njega u grane lipe, a potom su se udaljili sa lica mjesta, a on je ostao tako obješen, da bi u jednom trenutku traka pukla i oštećeni je pao zemlju.

dakle, za vrijeme oružanog sukoba, kršeći pravila međunarodnog prava nanosio povrede tjelesnog integriteta i primjenjivao mjere zastrašivanja prema civilima,

čime je učinio krivično djelo ratni zločin protiv civilnog stanovništva iz člana 142. stav 1 Krivičnog zakona Socijalističke Federativne Republike Jugoslavije,

OKRUŽNI JAVNI TUŽILAC

Napomena: „Podizanje optužnice protiv određene osobe ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom sudskom presudom ne utvrdi njegova krivica“.